

Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuut (Ataqqinaammik tunissutisitsisarneq akissarsisitsinikkullu tapiissuteqarnissamut tunngavik)

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerneqarnera

Aallarniutigalugu Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuummut atatillugu peqqissaartumik sulisimaneranut Naalakkersuisut sinnerlugit qutsavigaara.

Naalakkersuisuniit nuannaarutigalugu maluginiarparput, ataatsimiititaliap isumaliutissiisutaani takuneqarsinnaasoq amerlanerussuteqartut siunnersuut akuersissutigeqqullugu peqqusisut. Tamatuma saniatigut ataatsimiititaliap kaammattuutai maluginiarsimavakka, tassa ataqqinaammik tunissutisitsisarnerit eqqumiitsuliorneq pillugu aningaasaateqarfimmut suliassangortinneqassasut, taamaaliornikkut ataqqinaammik tunissutisitsisarnerit naalakkersuinikkut tulleriiaarineq tunngaviginagu pisassapput taamatullu toqqaannartumik akuliuttussaataanninngineq ataqqineqassalluni. Tamatuma saniatigut eqqumiitsuliornerit kattuffii kiisalu eqqumiitsuliorneq pillugu aningaasaateqarfik qanimut suleqatigalugit siunnersuummi nalunaarutit suliarineqartussanngornerat qilanaarutigaa.

Tamatuma saniatigut siunnersuutigineqartup piviusumik siunertarineqartumut naapertuunnersoq ataavartumik naliliiffigisarnissaa ataatsimiititaliamit kaammattuutigineqarpoq. Ataatsimiititaliap oqaaseqaatai tusaatissatut tiguakka.

Taamatuttaaq Naalakkersuisuniit maluginiarparput, eqqumiitsuliornerit inuusuttut tapersorsorneqarnerunissaat ataatsimiititaliamit kissaatigineqartoq, ataatsimiititaliamilu amerlanerussuteqartut nalunaarummik suliaqarnermi qanoq eqqumiitsuliornerit inuusuttut ataqqinaammik tunissuserneqarsinnaanersut Naalakkersuisunit aamma isummerfigeqqaat. Kissaatigineqartoq paasilluarpara, isummerfigisassatsinnullu ilanngunneqarnissaa qulakkeerumaarlugu. Akissarsisitsisarnerit eqqarsaatigalugit Naalakkersuisut inuusuttut piginnaanillit tapersorsornissaat ukkatariniarpaat.

Naalakkersuisut siunnersuutip aappassaaneerneqarneranut allannguutissamik siunnersuuteqarput. Allannguutit siunnersuutigineqartoq taamaallaat siunnersuutip atuutilerfissaanut attuumassuteqarpoq. Naalakkersuisut 1. januar 2023 atuutilerfissanngorlugit 2022-mi ukiakkut ataatsimiinnermi siunnersuut saqqummiussimavaat. Nalinginnaasumik inatsisitigut tunngaviit naapertorlugit inatsisit kingumut atuuttussanngorlutik atuutilerfissarneq ajormata allannguutissatut siunnersuummi siunnersuutip atuutilerfissaa 1. juli 2023-mut inissinneqarpoq.

Allannguutissatut siunnersuummi allannguutit imarisaasa akuerineqarnissaat siunertaralugu oqaatigineqartut tunngavigalugit siunnersuut pingajussaaneerseqassasoq Naalakkersuisut sinnerlugit inassutigaaara.